

章氏遺書

第二三冊

章氏遺書卷第二十八

外集一

蕭山王宗炎編次

吳興劉承幹校訂

爲梁光祿撰黃州魁星閣碑文

府縣分合因乎形勢而山川經緯風氣所開一方人文
係焉官廨民居城池廟社而外相度陰陽因其自然之
勢爲之興舉封表崇觀作鎮一方古人往往有之吾黃
山川盤鬱自黃安麻城縣互數百里以至府城演迤而
來必有凝注都會輻輳人文挺生 國朝順治五年鄉
前輩程公啟朱倡眾建魁星閣於臨江之湄巍然傑構
峙於水濱遙而望之若扼數百里磅礴扶輿之氣有以

攝其要而得其歸也百餘年來日就傾圯同里舉人孫君某甫復謀於眾而更新之斂貲庀材鳩工集事孫君獨力肩之不辭勞瘁閱四寒暑而告成功櫛比崇墉赫還舊觀孫君今年來赴期集因請余記其事余惟天官魁星北斗璇璣四星是也其閒戴筐六星爲文昌宮乃天之六府中有司祿實主科名故流俗以爲科舉主神有自來矣夫人文之興自有風教彤家厭勝與夫道家崇奉之說皆君子所弗由特是推表疆域必有崇觀以作之鎮既有營建必有所主以奠其神以山川爲人文所萃以人文爲斗魁默有所司禮以義起無在非教化之所助也余嘉孫君之能知所務也故不辭而爲之記

爲曹給事撰西軒義學碑

辛卯

西軒義學者縣令魏君國卿闢荒興廢百度經營良久而成者也先是府學西街有增福祠祠右有廢址半畝許地僻而蕪居民燒石炭棄灰成阜塙土赭礫高出民居纍然不可治君熟視之慨然曰可矣遂糾眾醵金付市牙用權子母取什一利既稍贍乃募人剷去頑土車運犂馱輿吁填道滓穢盡去突者爲窪去故納新削爲平地燒埴斬株結構簷簷榜題燦然曰西軒義學云是役也募金於乾隆六年辛酉集工於二十七年壬午正北講堂四楹左右學舍總八楹西北隅爲竈前出爲門東西廣四十五尺南北一百三十七尺繚以周垣截然

正方不坳不突計用白金四十八斤而魏君自任者居六之一師儒束脩薪水之資蓋尙有待焉噫可謂難已夫學所以變化氣質成就文章卓然使有所用也學者知廢址之可以塉土而塉土之可以華構也其於致思不遠矣余嘉魏君之意惜其成之之難而繼以老且病焉後有志魏君之志者當何以善其後而經理其緒餘庶學人之有所興起焉

爲金刑部撰余君墓碣

嗚呼此乾隆癸卯科舉人廣豐余君之墓瀾其諱宇昌其字號曰鶴山余於乾隆四十八年典試江西所得士也廣豐詎南昌遠榜發不及謁見明年期集京師君又

恨其不克於余得盡其繾綣也憶余方較試得君之文以謂其人蓋能自見性情者也有人言不余欺也君雖早世不竟所施而慈孝式於家庭詩書澤其後裔歿身之日無論知與不知莫不相與太息泣下以爲賢而有文則君可以無憾者也君娶於夏生一子曰本女子子二人君卒之明年其家葬君於本縣柿樹塘之原又明年丁未其仲兄濱來京師應禮部試下第南歸請余爲文以刻墓碣銘曰

君之仲來京師失寄金重不貲當監奴捶扑施仲蹙然請弗治寧自償毋彼笞仁人言利無涯一嚮舖鼎味知君家風厚澤遺宜食報享期頤僅卅一徒獻歎順與寧

聖所期家孝友室書詩後嗣昌天道宜勒貞珉告來茲
杜豐其家傳

公諱沛字豐其號樸庵會稽杜氏著望前村考濟之公
始居府城之東光里濟之公已上詳世牒濟之公五子
惟公最少公生三歲喪父鞠於母氏張少穎悟讀書強
識尤熟史事善議論康熙中鄉先生厲檢討煌最有重
名於後進不輕許可公執經請業厲君亟賞其文年十
七試童子於山陰前知縣顧某奇公文欲置公第一聞
公貲富引嫌亞之公不以屑意也然諸兄先後下世家
無應門公不得已棄去舉業讀書服古政於家庭性純
孝母病醫告術窮公遑遽不知所爲惟匍匐禱天乞以

身代夜夢神人語曰上帝感汝至性曲成汝孝已命汝
幼子代矣翌日子暴病亡而母病遂起聞者異之公氣
質剛毅意所不可人莫取犯惟母病唯唯若孱孺子意
喻色聽趨左與右若繞指柔嘗小築清幽壘石引泉略
具巖壑仿先世唐工部府君小山遺意榜其軒曰南壽
晨昏奉母怡怡得至樂也公操家政日久諸門仰如砥
砣出納以千萬計未嘗纖毫自私比諸兄子長成簿析
所有錙銖必均羣從子莫不膺服以謂非公幹濟先業
其衰公初不自表襮晚年以訓子孫蓋曰齊家之要惟
能克己則人自無閒言爾公生康熙辛酉卒乾隆辛酉
春秋六十有一以國子生授州同知配何安人山陰名

族習處華膺能以勤儉佐公杜氏故有質庫服用饒給
然其未析箸也長子承綸當午日拜慶先生不能具絺
葛則絮袍出見雖熱極汗漬不爲增製也此可以覘其
風矣

候選教諭彭君家傳

君諱祖賢字遐齡一字述齋宜昌長陽人先世隱居行
義父廷芝縣學生員工文早卒時君甫十歲兄商賢長
君五年熒熒相依值容美土司爲亂君兄弟挾穉弱蒙
險避地閒關徙匿瀕死而生踰兩年事定乃還方君之
避居某氏也以童稚卽知向學寒夜無鐙輒步屨廡下
記繹日所誦書每至四鼓不臥年十七與伯兄先後爲

生員兄弟自相師友益勵於學兄以家計中落棄儒而賈與君執手流涕以爲我不得已治生若穎慧宜勉自愛君泣諾名日起鄉人矜式其文行爭師事之廩膳積資當以貢銓教諭矣會伯兄卒遂絕意仕進前知縣犍爲李拔聞其賢聘主根山書院講席所成就諸生多可觀君性和易無賢愚皆樂就之而不敢干以非義處事周詳明決事見幾先初君季父廷蘭以訟坐株繫商賢倉卒以賤直鬻先世公業援之及家稍裕諷君以原值贖君曰向者署質僅兄某贖則人謂兄何其重名義如此年七十六卒君祖以孤幼育於金故再世承金姓及君乃復姓彭氏

章學誠曰余以撰通志客武昌見都士大夫輒詢其鄉先生行誼著述君之子淑適請檄武昌乃奉君狀請爲之傳云淑恂恂儒者其言攝瑞金崇仁縣恆惴惴焉以負辱其先是懼嗚呼君之身教可知已

尹太封翁暨德配伍太夫人六十初度屏風題辭

代

皇帝四十五載秋七月余扈 蹕避暑山莊尹公楚珍

以太僕少卿 特擢內閣學士兼禮部侍郎趨詣 行

在 召對稱旨 溫諭褒嘉楚珍退告余曰小子邊界

微末德薄能鮮荷 聖天子特達之知超擢逾等豈翳

小子之能實家封公義渠是承用克免於隕越惟茲季秋旬有四日爲封公六十初度之辰伍太夫人就養京

邱齊眉稱慶都人士相與祝嘏稱觴俾余一言介觴以進余不習爲流俗應酬錦幃泥金侈言頌禱文字以其近於市也惟中朝薦紳耆儒宿齒一二嘉言令範則樂得而書之爲後學者規式焉始乾隆甲戌余以翰林分教庶常於時封公登進士第授庶吉士獲與朝夕論文始識封公封公爲人淳懿淵謐不爲嶄絕崖岸而典型儼然迥出流輩余固聳然異之厥後封公官中書楚珍以翰林改官天曹洊厯臺垣父子竝著清望中朝人士一時以仕宦名家學者咸推封公今封公致政三年而楚珍厯躋通顯或以封公教子服官至是乃效而不知封公政於家植於學而楚珍得於趨庭之益者蓋不自

服官始也尹氏在宋爲河南望族前明始遷雲南著籍
蒙自代有聞人入國朝而益顯前廣東新寧知縣崇
祀名宦某甲公者封公祖也前廣西桂林同知某甲公
者封公父也兩世清聞淑德嶺岫以起封公自幼而長
率其義方蓋若河源導自崑崙逶迤鬱積有自來矣封
公天性純孝事父母能察形聲視聽入於隱微先後丁
內外艱皆廬於墓次未除喪足不入燕寢鄉里稱其難
能昆弟五人竝克孝友嫺睦伯仲之間以德行道藝自
爲師友鄉人推爲人倫之望咸曰尹氏尹氏云爾封公
父子先後通籍厯官中朝其閒將家南北一再往返水
陸萬里資給贏頓官清不足自給而封公不忍累昆若

弟也則決計析箸羣從固不可久之始定然而門庭以內未嘗以財貨自私說者謂封公之克已羣從之敦睦春秋所謂葛藟之旨詩人所詠棠棣之義何必古人聞者以爲美談封公之於學刊落枝蔓獨窺根柢弗爲名高樸屬微至其發爲文辭原本經術爾雅深厚如布帛菽粟有切於人生日用雅不欲世人知之學者無論習與不習望而知爲有道之言也始封公登進士第於時進士釋褐王公大臣先進退其可不可乃得引奏雲南進士獲與選者二人封公奏名居後 天子獨嘉許之卽擢翰林而以奏前名者觀六部政封公素行落落不能隨時尙爲趨避至是人益服封公守而仰見 聖天

子人倫之鑒非尋常所測識也厥後改官中書悠游薇
省十有餘年後進之士或以才略進取躡躋臚仕前後
相屬而封公落落如故或謂封公無意於仕封公不屑
也楚珍稟封公教率而循之無有加損然自己丑館試
改官曹郎十年而進參綸閣或謂封公教子優於其仕
而封公不屑也蓋其政於家植於學出之有本如河之
恃源而往日守之風過之不足爲水之盈縮理易明也
昔李邕謂唐受宰相未有稱具慶者惟代國郭公稱爲
一朝之盛今二品大僚參佐黃閣其年齒如楚珍者亦
閒有之而封翁太母以甫登周甲之年獲膺綸綍竝進
壽觥而封公又嘗官薇省有聞於時尤爲前人所未覩

也古云本深者實茂積厚者流光封公政家以道而伍太夫人又相之莊敬慈惠可謂有配德矣伍太夫人出阿迷州望族未嫁事父母既來歸迨事祖姑及君舅君姑竝以孝謹稱凡內則之篇劉向曹大家之所傳頌學士家習爲常談太夫人獨懇摯行之諸姑娣姒薰其德而不知其化於無形也今老矣其於封公閨門內猶若嚴師友焉丈夫子五人並能以孝弟文學稱其家範則封公之膺懋祉者遠矣他日羣從繼起後先輝映太史景星之書當載筆俟之爾

爲周永清撰吳翼堂封翁八十壽序

今庚子秋八月之吉爲 封資政大夫前翰林編修提

督福建學政翼堂吳太先生八秩誕辰先生長公淡人
克承家學官大京兆宣化邦畿敦政窈窕內肅外雍禮
宣樂節士式懿修民懷矩絜而震榮承乏赤縣例隨屬
車揚觴用以私淑於京兆公者謹爲先生誦之庶幾備
福於旣醉焉先生歛之望族少有令名於學無所不窺
尤邃義經初筮鴻漸十三食餼鄉校再筮允升弱冠拔
萃成均筮觀光三十登甲第爲史臣筮萃聚丙辰丁巳
校春秋試號得人桐城文和相國掌翰林事先生館其
家課誦外不知所泊相國語人曰吾重先生學而先生
乃占於白賁者也先生於辛酉視學閩中閩士得先生
乃若山下出泉曠如發蒙武平有冤獄上剛下險殺人